

FAMPIANARANA

Mety ho maro ireo zaza tsy ho afa-mianatra amin'ny taom-pianarana vaovao

Tsy nisy filefahana ny ankamaroan'ireo sekoly tsy miankina amin'ny fanjakana, fa nizi-riziry avokoa izy rehetra tamin'ny fanerena ireo ray aman-drenin'ny mpianatra handoa feno ny saram-pianarana rehetra tamin'ireo volana telo na efatra tsy nianarana. Nanomboka ny volana aprily hatramin'ny jona sy jolay, volana tsy nianaran'ny mpianatra ireo noho ny fepetra amin'ny hamehana ara-pahasalamana. Anisan'ny nanao izany ireo sekoly tsy miankina rehetra eny amin'ny Cité Ilaosy eny, izay tsy nandefitra mihitsy tamin'izany. Mafy ho an'ireo ray aman-dreny marobe izany satria niaran'ny krizy ara-tsosialy toy ny rehetra ihany koa izy ireo.

Ankoatra ny fandoavana ny saram-pianarana koa anefa, dia tsy maintsy nandao ny saram-pisoratana anarana vaovao manaraka indray koa ho amin'ny taom-pianarana vaovao izy ireo. Manampy trotaka ny fividianana ireo fitaovam-pianaran'ny mpianatra, izay tsy



maintsy hiaka-bidy ihany koa. Etsy ankilan'izay anefa tsy mbola mivaha ny olana amin'ny fihariana sy ny fivelomana, fa mbola mijanona ao anaty fahavoazana hatrany. Marobe amin'ireo ray aman-dreny no sahirana mafy ara-pivelomana amin'izao fotoana izao, ny sakafo hohanin'ny ankohonana aza hifampitadiavana andro aman'alina. Mazava loatra, fa tsy maintsy handefitra mihatra amin'ny sakafo aloha ny fam-pianarana. Mbola eo koa aza ny lafiny fitafiana sy ny ara-pahasalamana.

Efa fantatra mazava ny fihetsik'ireo sekoly tsy miankina, fa ny vola alohan'ny lafiny fanabeazana, izay noheverina fa ankinina aminy. Tsy maintsy voaloha aloha ny saram-pianarana sy ny pitsopitsy rehetra vao afaka miditra an-dakilasy sy mianatra ny zaza. Tsy ho azy voaray sy hianatra eny amin'ny sekolim-panjakana koa anefa ny rehetra tsy afaka. Ny eny koa aza mbola mety misy maro mitsoaka an-daharana amin'izao taom-pianarana hoavy izao. Ireo tompondraikitra ny se-

koly koa re fa efa nifanaraka fa tsy hanome ny dôsién'ny mpianatra hifindra sekoly raha tsy efa nahaloa ny saram-pianarana rehetra sy ny vola samihafa rehetra tokony haloa. Maro amin'ireo ray aman-dreny araka izany no tsy afaka hampiditra ny zanany hianatra noho ny antony tsy azony anoharana intsony. Mety hisy fiantraikany amin'ireo isan'ny zaza tsy ho afa-mianatra an-tsekoly eto amin'ny firenena izany tranga izany.

Radafy

Mpianatra Malagasy tany Chine

Nody tsy nahazo diplaoma ny ankamaroany

Nody tsy nahazo diplaoma ny ankamaroan'ireo mpianatra Malagasy nandrandro fianarana Chine araka ny vaovao voaray. Ny 90%-n'ireo mpianatra miisa 272 nahavita fianarana tany Chine, no nody tsy nahazo diplaoma, izany hoe ny 245 tamin'izy ireo. Ny antony dia tsy naloan'ny fanjakana Malagasy ny vatsim-pianaran'izy ireo. Maro amin'izy ireo anefa no manana Maitrise sy Doc-

torat. Ny 10% dia ireo raianandreny no nameno ny banga, satria 30 volana ny vatsim-pianarana tsy voaloha. Mpianatra afaka mitana andraikitra tsara eo amin'ny tontolon'ny asa fampandrosoana eto amintsika anefa ireto tanora manam-pahaizana ireto. Efa hatramin'ny taona 2012 no nisy ity olan'ny mpianatra Malagasy tany Chine ity.



Aly

Beijing, renivohitra ny Repoblika Entim-bahoakan'i Chine.

Kaominina Alasora

Hanome cours maimaimpoana ireo hanala fanadinana BEPC

Na ao anatin'ny fahasahiranana tanteraka aza amin'izao fihiboana noho ny hamehana ara-pahasalamana izao ny orinasa, ny kaominina maro samihafa eto amin'ny firenena, dia tsy nikely soroka ny kaominina Alasora distrikan'Antananarivo Avaradrano, tarihin'ny ben'ny Tanàna Jimmy Randrian-tsoa, fa mitsinjo hatrany ireo ankizy manala fanadinam-panjakana. Tamin'ny fanadinana CEPE ho an'ireo kilonga madinika dia nisy ny fanomezany sakafo ho an'ireto farany hanampiana ny ray amandreny amin'izao fahasahiranana mahazo ny



Ny ben'ny tanànan'Alasora, Jimmy Randrian-tsoa.

tokantrano Malagasy izao. Ankehitriny, amin'izao an-

katoky ny fanalàna fanadinana BEPC izao indray,

dia tsy mijery fotsiny ny kaominina Alasora, fa hisy ny fanomezany cours maimaimpoana (gratuit), ho an'ireo tanora hatrika izany manerana ny ZAP Alasora, satria iaraha-mahafantatra fa sarotra ihany ny miandry azy ireo noho ny fahatapatapahan'ny fianarana tamin'ity taom-pianarana ity. Ho tanterahana manomboka ny 07 ka hatramin'ny 18 septambra izany ao amin'ny CEG Alasora. Miaramiasa sy mifanome tanana amin'ny fanatantarahana izany ny mpampianatra rehetra ao antoerana.

Helisoa

Ady amin'ny tsy fandriampahalemana

Voasambotra ilay jiolahy mpamono zokiolona

Miseho lany amin'izao fotoana ny tsy fandriampahalemana, noho ny asan-dahalo any amin'ny distrikan'i Tsaratanana, faritra Betsiboka iny. Noho ny ezaky ny fokonolona sy ny mpitandro ny filaminana tany an-toerana, voasambotry ny miaramila ao amin'ny ZRPS DELTA, distrikan'i Tsaratanana tamin'ny faran'ny herinandro lasa teo ny dahalo namono nahafaty zokiolona iray tany an-toerana. Marihina fa efa natolotra ny Zandary ao Tsaratanana ity nahavanon-doza ity.

Stefa



Ilay jiolahy nahavanon-doza tany Tsaratanana.

Polisy Tsaralalana

Vehivavy very saina, miandry ny fianakaviany haka azy

Ny ao amin'ny polisim-pirenena dia milaza sy miangavy, izay mahafantatra an'ity vehivavy hita amin'ny sary ity, mba hampandre ny fianakaviana akaiky azy, ka haka azy etsy amin'ny Polisy misahana ny olona marefo na ny "Brigade Féminine de Proximité" eo Tsaralalana.

Nividy zavatra tamina tranombarotra lehibe iray tetsy Antanimena izy, ka tsy nandao vola rehefa tonga teny amin'ny caisse no sady niteniteny zavatra tsy mitombina. Ny mpiambina ity tranombarotra ity no nitondra ilay vehivavy teny amin'ny Polisy, ka rehefa nanontaniana ny momba azy dia tsy nisy fantany ankoatra ny anarany izay nolazainy hoe "Julie". Tsy nisy ny taratasy mahakasika azy ary tsy nahitana finday ihany koa izy, ka anisan'ny antony tsy nahalalana ny momba azy. Efa eny amin'ny Brigade de Proximité etsy Tsaralalana izy ary miandry ny fianakaviany ho an'izay mahalala azy.

Stefa



Ilay vehivavy very saina, etsy amin'ny polisy Tsaralalana.

PRIERE AU SACRE CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue.

Remerciements au Sacré Cœur pour faveurs obtenues.

Sandra A.